

四庫全書

集部

欽定四庫全書

御定佩文齋詠物詩選卷十一

霧類

五言古

詠霧

梁元帝

曉霧晦階前垂珠帶葉邊
五里浮長隰三晨晦遠天
傍通似佳氣却望若飛煙
疎簾還復密斷岫更疑連
還思逢樂廣能令雲霧褰

其二

三晨生遠霧五里闔城閨從風疑細雨暎日似游塵乍
若輕煙散時如佳氣新不妨鳴樹鳥時蔽摘花人

舟行值早霧

梁伏挺

水霧雜山煙冥冥不見天聽猿方忖岫聞瀨始知川漁
人惑澳浦行舟迷汴沿日中氛靄盡空水共澄鮮

賦得霧

梁沈超

窈鬱蔽園林依霏被軒牖晡有始疑空瞻空復如有游

蛇隱遙漢文豹棲南阜既殊三五輝遠望徒延首

詠霧應詔

北周王褒

七條開廣陌五里閭朝氛帶樓疑海氣含蓋似浮雲方
從河水上預奉綠圖文

賦得花庭霧

唐太宗

蘭氣已熏宮新蕊半妝叢色含輕重霧香引去來風拂
樹濃舒綠縈花薄蔽紅還當雜行雨彷彿隱遙空

凌霧行

唐韋應物

卷十一
秋城海霧重職事凌晨出浩浩合元天溶溶迷朗日纔
看含鬢白稍視沾衣密道騎全不分郊樹都如失霏微
誤噓吸膚腠生寒慄歸當飲一杯庶用蠲斯疾

水亭夜坐賦得曉霧

唐李益

月落寒霧起沈思浩通川宿禽囀木散山澤一蒼然漠
漠沙上路沄沄洲外田猶當依遠樹斷續欲窮天

五言律

賦得遠山澄碧霧

唐太宗

殘雲收翠嶺夕霧結長空帶岫凝全碧障霞隱半紅彷彿分初月飄飄度曉風還因三里處冠蓋遠相通

詠霧

唐董思恭

蒼山寂已暮翠觀闌將沈終南晨豹隱巫峽夜猿吟天寒氣不歇景晦色方深待訪公超市將予赴華陰

詠霧

唐蘇味道

氤氲起洞壑遙裔匝平疇乍似含龍劒還疑映蜃樓拂林隨雨密度逕帶煙浮方謝公超步終從彥輔游

霧

唐李嶠

曹公迷楚澤漢帝出平城
涿野妖氛靜丹山霽色明
類煙飛稍重方雨散還輕
儻入非熊兆寧思玄豹情

大霧過安慶

元傅若金

水郭浮鮫室雲帆度客星
江空連海白山遠入淮青
訪古聊須到乘流未可停
遙疑天柱曉風霧颭精靈

五言排律

晨霧

明楊慎

安寧之交杪秋初冬、天將晴霽晨必大霧千
里一白如銀色界須臾日出霞彩輝煥亦奇

觀也

玄冥當凜節白霧翳晨朝明月朦朧閣清霜暖對橋冰
漸工織水花松慣封條嵐市天褰幕煙垆陸湧潮鳬疊
迷獨釣鹿徑滑歸樵文采南山豹威稜北塞貂駟星收
閃閃曦景煥昭昭梅信懸知近憑他酒旆招

七言律

早霧

宋趙抃

山光全暝水光浮數里霏霏曉霧收露彩乍凝藏漢殿
日華不透掩秦樓豈饒文豹遲留影應有靈蛇取次遊
聖世妖氛消已盡結成佳氣滿南州

花霧

元謝宗可

倦紫酣紅總未醒暗薰芳液滴無聲羅幃隱繡迷春色
綺縠籠香護曉晴薄暝枝頭留睡蝶輕陰樹底咽啼鶯
東風卷到闌干曲半濕游絲舞不成

詠霧松

明楊慎

怪得天雞誤曉光青腰玉女試銀妝
瓊敷綴葉齊如剪瑞樹開花冷不香
月白詎迷三里霧雲黃先兆萬家箱
貧兒飯瓮歌聲好六出何須賀謝莊

忠州霧泊

明鍾惺

漁艇官舟曉泊同蜀江愁霧不愁風
煙生野聚汀寒外雲滿山城水氣中
曲岸川迴翻似盡遙天峰沒却如空
依稀往日丹楓路稍見霜前遠近紅

五言絕句

閒泛

明僧大遂

無事亦波間
孤舟覺自閒
樹邊春霧斂
尖露幾重山

七言絕句

霧淞

宋曾鞏

園林日出靜無風
霧淞花開樹樹同
記得集賢深殿裏
舞人齊插玉瓏璁

房陵

宋陳造

陰晴未敢捲簾看
苦霧濛濛尚未乾
政使病餘剛止酒

一杯要敵滂朝寒

自注晨起霧久乃散土人目曰滂朝

霧中見靈山依約不真

宋楊萬里

東來兩眼不曾寒
四顧千峰掠曉鬟
天欲惱人消幾許
只教和霧看靈山

曉行

宋葛長庚

雨餘花點滿紅橋
柳絮沾泥夜不消
曉霧忽無還忽有
春山如近復如遙

水邨霧

葛長庚

淡處還濃綠處青江風吹作雨毛腥起從水面縈層嶂
恍似簾中見畫屏

夾蘿峰


明顧源

紅日纔生暘谷東魚龍吹浪曉濛濛徜徉笑指三山路
玉竈銀牀紫霧中

題朱元暉山水小景贈陳原貞別

明僧似杞

江頭雨足春水生
江上青山煙樹暮
扁舟明發去如飛
目斷征帆入蒼霧



御定佩文齋詠物詩選卷十一

欽定四庫全書

集部

御定佩文齋詠物詩選卷十二至十四

詳校官侍郎_臣李封

主事銜_臣徐以坤覆勘

總校官檢討_臣何思鈞

校對官中書_臣高 中

謄錄監生_臣蔡炎林

欽定四庫全書

御定佩文齋詠物詩選卷十二

露類

四言古

甘露頌

北齊
邢邵

休徵屢動感極迴天流甘露素玉潤冰鮮
密房下結珠
排上懸布濩林野灑散旌旃

芳林園甘露頌

北齊
梁神珣

福以德彰慶沿業皎矧茲嘉露因祥特表翻潤星夕流
甘月曉奇越彫氛珍逾素鳥至道伊融大化期肇惟此
大化實感天眷降液丹墀飛津綺殿九服依風八荒改
面散述朦詞式旌舞忭

五言古

賦得露

梁顧煊

飛空猶蘊狀集物始呈華萎黃壓秋筍厭浥長春芽非
惟溥蔓草頗亦變蒹葭仍增江海浪聊點木蘭花

驚早露

梁劉憺

九畹凝芳葉百草瑩新珠
盈荷雖不潤拂竹竟難枯

詠采甘露應詔

陳江總

祥露曉氛氲上林朝晃朗
千行珠樹出萬葉瓊枝長
徐輪動仙駕清晏留神賞
丹水波濤泛黃山煙霧上
風亭翠旆開雲殿朱絃響
徒知恩禮洽自慚名實爽

應詔甘露寺

北齊邢邵

膏露且漸洽凝液汭旂旂
草木盡沾被玉散復珠霏
誰

謂穹昊遠道合若應機

詠露

唐董思恭

夜色凝仙掌晨甘下帝庭不覺九秋至遠向三危零蘆渚花初白葵園葉尚青晞陽一灑惠方願益滄溟

尹相公京兆府中棠樹降甘露詩

唐岑參

相國尹京兆政成人不欺甘露降府庭上天表無私非無他人家豈少羣木枝被茲甘棠樹美掩召伯詩團團

甜如蜜自凝若脂
玉光碎萬顆
珠葉垂崑崙
何時來慶雲
相逐飛魏宮
銅盤貯漢帝
金掌持王澤
布人和精心
動靈祇
君臣日同德
禎瑞方潛施
何術令大臣
感通能及茲
忽驚政化理
暗與神物期
却笑趙張輩
徒稱古今稀
為君下天酒
麴藥將用時

五言律

秋露

唐駱賓王

玉關寒氣早
金塘秋色歸
泛掌光逾淨
添荷滴尚微
絳

霜凝曉液承月委圓輝別有吳臺上應濕楚臣衣

露

唐李嶠

滴瀝明花苑歲蕤泣竹叢玉垂丹棘上珠湛綠荷中夜
警言十年鶴朝零七月風願凝仙掌內長奉未央宮

白露

唐杜甫

白露團甘子清晨散馬蹄圃開連石樹船渡入江谿憑
几看魚樂迴鞭急鳥棲漸知秋實美幽徑恐多蹊

五言排律

賦得金莖露

唐徐敞

漢帝貴長生延年餌玉英銅盤滴珠露仙掌抗金莖拂
曙氛埃欽凌空沆瀣清宮堯捧瑞氣寵從出宮城勢入
浮雲聳形標霽色明大君當御宇何必去蓬瀛

賦得清露被皋蘭

唐孫顧

九皋蘭葉茂八月露華清稍與秋陰合還將曉色并向
空羅細影臨水沍微明的皦添幽興芊緜動遠情夕芳
人未采初降鶴先驚為感生成惠心同葵藿傾

賦得春草凝露

唐張友正

蒼蒼芳草色含露對青春已賴陽和長仍慙潤澤頻日
臨殘未滴風度欲成津蕙葉垂偏重蘭叢洗轉新將行
愁裏徑欲采畏濡身獨愛池塘畔清華遠襲人

五言絕句

詠露珠

唐元稹

秋荷一滴露清夜墜元天將來玉盤上不定始知圓

七言絕句

奉和三日祓禊渭濱應制

唐張說

青郊上已艷陽年
紫禁皇遊祓渭川
幸得歡娛承湛露
心隨草樹樂春天

甘泉歌

唐王昌齡

乘輿執玉已登壇
細草沾衣春殿寒
昨夜雲生拜初月
萬年甘露水晶盤

長安秋夜

唐李德裕

內官傳詔問戎機
載筆金鑾夜始歸
萬戶千門皆寂寂

月中清露點朝衣

秋思

唐王涯

宮連太液見滄波
暑氣微消秋氣多
一夜輕風蘋末起
露珠翻盡滿池荷

露

唐袁郊

湛湛騰空下碧霄
地卑濕處更偏饒
管茅豐草皆沾潤
不道良田有旱苗

野塘

唐韓偓

侵曉乘涼偶獨來不因魚躍見萍開
卷荷忽被微風觸瀉下清香露一杯

中秋前偶成

元虞集

空林月落大如盤雞犬無聲曉氣寒
童子擬謀朝一食玉杯盛得露漙漙

上京即事

元薩都刺

五更寒襲紫毛衫睡起東窗酒尚酣
門外日高晴不得滿城濕露似江南

絕句

元 吳景奎

蘆花方褥竹方牀，
葛帳含風薤簟涼。
半夜起來山月白，
滿天清露灑衣裳。

江上曲

明 劉基

月出前山青黛寒，
鴈聲遙下碧雲端。
草頭錯認驪珠吐，
自是西風白露團。

小遊仙

明 王澤

獨繞瑤壇歌洞章，
青天如水月華涼。
閒將一掬芙蓉露，

乞與神龍作雨香

欽定四庫全書

御定佩文齋詠物詩選
卷十二

御定佩文齋詠物詩選卷十二

欽定四庫全書

御定佩文齋詠物詩選卷十三

霜類

五言古

詠霜

梁
張率

駟見視乾度鐘鳴測地機
秋冬交代序朝霜白綏綏原
野生暮靄堦墀散夕霏
徘徊總嚴氣悵望淪清輝
平臺寒月色池水愴風威
凝陰同徂夜帶雁獨歸飛
縈叢亂

蕪絕繁林紛已稀貞松非受令芳草徒具腓

新霜

宋文同

新霜著庭樹葉下如猛判蕭然物容改有若懼凌挫砌
下丹橘落牆邊紫榴破精光竹勁健阻喪柳怯懦覽景
惜向晚感時驚忽過勝事實可樂閒愁本堪唾何當
共嘉客對此酌香糯

五言律

詠霜

唐蘇味道

金祇暮律盡玉女暝氛歸孕冷隨鐘徹飄華逐劒飛帶
日浮寒影乘風進晚威自有貞筠質寧將衆草腓

新霜

宋 孔平仲

皎皎寒月白清晨霜滿林萌芽至今日肅殺爾何心入
水成冰暈迷天作雪陰自茲開火閣却坐小窗深

答霜晴詩

元 陳 深

旭日照蕭晨淒清不受塵冷光明似雪冬暖勝如春紅
葉輝相照黃花色愈新南窗差可愛曝背豁天真

其二

朝暾上高樹霧卷海天遥勁氣乘寒凝嚴威見日消鐘
清出遠寺馬滑恐危橋稍偏南枝暖疎花破寂寥

五言排律

白露為霜

唐
顏 粲

悲秋將歲晚繁露已成霜徧渚蘆先白露籬菊自黃應
鐘鳴遠寺擁鴈度三湘氣逼襦衣薄寒侵宵夢長滿庭
添月色拂水斂荷香獨念蓬門下窮年在一方

七言律

霜花

元謝宗可

粲粲瑤英借露浮，日高還付水東流。
剪裁應費金神巧，開落從教玉女愁。
有豔淡粧宮瓦曉，無根寒壓版橋秋。
五更不怕樓頭角，吹到梅花特地羞。

五言絕句

公安早行

元宋 裴

誤聽野雞鳴，揚鞭趣驛程。
平明見茅屋，方覺冒霜行。

七言絕句

城內花園值春霜

唐
劉禹錫

樓下芳園最占春
年年結伴采花頻
繁霜一夜相撩治
不似佳人似老人

代祕書贈弘文館諸校書

唐
李商隱

清切曹司近玉除
比來秋興復何如
崇文館裏新霜後
無限紅梨憶校書

宮詞

唐
王涯

銀餅瀉水向朝粧
燭燄紅高粉壁光
共怪滿衣珠翠冷
黃花瓦上有新霜

城頭晚步

宋楊萬里

古城秋後不勝荒
人迹新行一逕長
竹影已搖將午日
草根猶有夜來霜

霜曉

楊萬里

荒荒瘦日作秋暉
稍稍微暄破曉霏
只有江楓偏得意
夜接霜水染紅衣

十月十五夜作

金朱之才

披衣開戶幾宵興
永夜無眠冷不勝
坐覺飛霜明屋瓦
天如寒鑑月如冰

明安驛道中

元陳孚

野鵲山頭野草黃
野狐嶺上月茫茫
五更但覺天風冷
帳頂青氍一寸霜

山居吟

元僧清珙

半窗斜日冷生光
破衲蒙頭坐竹牀
枯葉滿爐燒燄火

不知屋上有新霜

宮詞

明
陳沂

翠荇紅蓮水殿香
不知簾外易生涼
夜來許賜金莖露
明日驚看玉樹霜

泊長蕩

明
朱多炆

蒹葭一望暮蒼蒼
長蕩湖頭煙水長
怪道今朝楓葉盡
夜來七十二橋霜

御定佩文齋詠物詩選卷十三

欽定四庫全書

御定佩文齋詠物詩選卷十四

雪類

五言古

冬歌

晉樂府

寒雲浮天凝積雪
冰川波連山結玉
巖脩庭振瓊柯

詠白雪

宋鮑照

白珪誠自白不如雪
光妍工隨物動氣能
逐勢方圓無

妨玉顏媚不奪素繒鮮投心障苦節隱迹避榮年蘭焚
石既斷何用恃芳堅

學劉公幹體

鮑照

北風吹朔雪千里度龍山集君瑤臺上飛舞兩楹前茲
晨自為美當避豔陽天豔陽桃李節皎潔不成妍

白雪歌

齊
徐孝嗣

風閨晚翻靄月殿夜凝明願君早流眄無令春草生

同劉諮議詠春雪

梁
簡文帝

晚霰飛銀礫浮雲暗未開入池消不積因風墮復來思
嬋流黃素溫姬玉鏡臺看花言可折定自非春梅

雪朝

簡文帝

同雲凝暮序嚴陰屯廣隰落梅飛四注翻霙舞三襲實
斷望如連恒分似相及已觀池影亂復視簾旌濕

詠雪

顛倒使韻

簡文帝

鹽飛亂蝶舞花落飄粉匝匝粉飄落花舞蝶亂飛鹽

詠雪應令

梁沈約

思鳥聚寒蘆蒼雲軫暮色夜雪合且離曉風驚復息嬋
娟入綺窗徘徊驚情極弱桂不勝枝輕飛屢低翼玉山
聊可望瑤池豈難即

詠餘雪

沈約

陰庭覆素芷南堦塞綠葦玉臺新落構青山已半虧

望雪

梁丘遲

氛氲發紫漢雜沓被朱城倏忽銀臺構俄頃玉樹生綿
綿九軌合昭昭四區明

同謝朓花雪

梁任昉

土膏候年動積雪表晨暮散葩似浮玉飛英若總素東序皆白珩西雝盡翔鷺山經陋密榮騷人貶瓊樹

詠花雪

梁庾肩吾

瑞雪墜堯年因風入綺錢飛花灑庭樹凝瑛結井泉寒光晦八極同雲暗九天已飄黃竹路共慶白渠田

和司馬博士詠雪

梁何遜

凝堦夜似月拂樹曉疑春蕭散忽如盡徘徊已復新暫

蔽卷紉質復慚施粉人若逐微風起誰言非玉塵

詠雪

梁 裴子野

飄飄千里雪倏忽度龍沙從雲合且散因風卷復斜拂
草如連蝶落樹似飛花若贈離居者聊以代瑤華

詠雪

陳 徐陵

瓊林元圃葉桂樹日南華豈若天庭瑞輕雪帶風斜三
農喜盈尺六出儻崇花明朝闕門外應見海神車

詠雪應衡陽王教

陳 張正見

九冬飄遠雪六出表豐年
睢陽生玉樹雲夢起瓊田
入窗輕落粉拂柳駛飛綿
欲動淮南賦亂下桂花前

春近餘雪應詔

北周

庾信

送寒開小苑迎春入上林
絲條變柳色香氣動蘭心
待花思對酒畱雪擬彈琴
陪遊愧竝作空見奉恩深

玩雪

隋

王衡

寒庭浮暮雪疑從千里來
皎潔隨處滿歷亂逐風回
僻臺如始構瓊樹似新栽
不待陽春節誰持競落梅

喜雪

唐太宗

碧昏朝合霧丹卷暝韜霞結葉繁雲色凝璫徧雪華光
樓皎若粉映幕集疑沙泛柳飛飛絮妝梅片片花照壁
臺圓月飄珠箔穿露瑤潔短長堦玉叢高下樹映桐圭
累白縈峰蓮抱素斷續氣將沈徘徊歲云莫懷珍媿隱
德表瑞佇豐年蕊間飛禁苑舞處憶伊川儻詠幽蘭曲
同歡黃竹篇

望雪

太宗

凍雲宵徧嶺素雪曉凝華入牖千重碎迎風一片斜不
妝空散粉無樹獨飄花紫空慚夕照破彩謝晨霞

詠雪

太宗

潔野凝晨曜裝墀帶夕暉集條分樹玉拂浪影泉璣色
灑妝臺粉花飄綺席衣入扇紫離匣點素皎殘機

苦雪

唐高適

濛濛灑平陸淅瀝至幽居且喜潤羣物焉能計斗儲故
人久不見鳥雀投吾廬

淮海對雪贈傅靄

唐李白

朔雪落吳天從風渡溟渤海樹成陽春江沙皓明月飄
飄四荒外想像千花發瑤草生階墀玉塵散庭闕興從
剡谿起思繞梁山發寄君郢中歌曲罷心斷絕

雪中

唐韋應物

空堂歲已晏密室獨安眠壓篠夜偏積覆閣曉逾妍連
山暗古郡驚風散一川此時騎馬出忽省京華年

滁城對雪

韋應物

晨起滿闌雪憶朝閭闔時玉座分曙早金爐上煙遲飄
散雲臺下凌亂桂樹姿厠迹鵷鷺末蹈舞豐年期今朝
覆山郡寂寞復何為

嘲雪

唐李賀

昨日登蔥嶺今朝下蘭渚喜從千里來亂笑含春語龍
沙濕漢旗鳳扇迎秦素久別遼城鶴毛衣已應故

雪夜畱梁推官飲

宋梅堯臣

晝雪落旋消夜雪寒易積燈清古屋深爐凍殘煙碧為

沽一斗酒暫對千里客酒薄意不淺輕今須重昔重昔
是年華飄飄猶過隙一醉冒風歸平明馬無跡

雪傲柳子厚

宋 晁冲之

月落雞聲寒曉色靜茅屋開門驚不知夜雪壓脩竹搓
牙生新冰鱗甲刻谿谷晶晶洲渚明冽冽川源肅孤蹲
雀不動沉酣客猶宿呼童晨汲歸獨漱寒泉玉

分韻賦雪得雨字

金 趙 夙

大雪初不知開門已無路驚喜視歷日此瑞固有數池

冰凍欲合林鴉噤仍聚已成玉壺瑩尚作寶花雨造物
洵多才中有無盡句大兒擬圭璧小兒比鹽絮後人例
蹈襲彌復入窘步聚星號令嚴亦自警未悟誰將五色
筆繪此天地素好語覓未來更待偶然遇

春日雪中

元表易

蕭齋聽寒雨出戶霰已集飛霰點砌銷綠苔稍沾濕紛
紛漸填委勢若包原隰冥觀陰陽妙欲張故先翕定知
陳菱下已有春風入

江天暮雪

元陳孚

長空卷玉花汀洲白浩浩雁影不復見千崖暮如曉漁翁寒欲歸不記巴陵道坐睡船自流雲深一蓑小

雪

明許繼

山花寒不開庭雪曉還積江南十日春東風未相識蕭條新柳姿清淺舊池色日晏啟柴扉迢迢遲來客

月下望雪

明薛蕙

朝看雲際雪夜坐月中樓宛似青天上俯觀銀漢流猶

憐目未盡好為上簾鉤

竹灣雪艇

明

岳岱

鷗飛江上雪雪覆江邊竹扁舟不可渡遠望迷川陸漁父暮歸來蓑衣滿珠玉

六言古

貌雪

梁

蕭統

既同標梅萼散復似大谷花霏密如公超所起皓如淵客所揮無羨崑崙巖列素豈匹振鷺羣飛

七言古

奉和聖製瑞雪篇

唐 劉庭琦

紫宸飛雪曉徘徊層閣重門雪照開
九衢晶耀浮埃盡千品差池贄帛來
何處田中非種玉誰家院裏不生梅
埋雲翳景無窮已因風落地吹還起
先過翡翠寶房中轉入鴛鴦金殿裏
美人含笑出聯翩艷逸相輕鬪容止
羅衣點著渾是花玉手搏來半成水
奕奕紛紛何所如頓憶揚園二月初
羞同班女高秋扇欲照君王乙夜書

姑射山中符聖壽芙蓉闕下降神車願隨睿澤流無限
長報豐年貴有餘

白雪歌送武判官歸京

唐岑參

北風卷地白草折邊城八月即飛雪忽如一夜春風來
千樹萬樹梨花開散入珠簾濕羅幕狐裘不煖錦衾薄
將軍角弓不得控都護鐵衣冷難著瀚海闌干百丈冰
愁雲慘澹萬里凝中軍置酒飲歸客胡琴琵琶與羌笛
紛紛暮雪下轅門風掣紅旗凍不翻輪臺東門送君去

去時雪滿天山路山迴路轉不見君雪上空留馬行處

少室晴雪送王寧

唐李頎

少室衆峰幾峰別一峰晴見一峰雪隔城半山連青松
素色峨峨千萬重過景斜臨不可道白雲欲盡難為容
行人與我玩幽境北風切切吹衣冷惜別浮橋駐馬時
舉頭試望南山嶺

聚星堂雪

宋蘇軾

窗前暗響鳴枯葉龍公試手行初雪映空先集疑有無

作態斜飛正愁絕衆賓起舞風竹亂老守先醉霜松折
分無翠袖點橫斜祇有微燈照明滅歸來尚喜更漏永
晨起不待鈴索掣未嫌長夜作衣袂却怕初陽生眼纈
欲浮大白追餘賞幸有回飈驚落屑糝糊檜頂獨多時
歷亂瓦溝裁一瞥汝南先賢有故事醉翁詩話誰續說
當時號令須聽取白戰不許持寸鐵

西山晴雪

元陳孚

凍雀無聲庭檜響冰花灑檐大如掌平明起望巖壑間

插天瑤瓊一千丈夕陽微漏光嵯峨倚闌更覺爽氣多
雲間落葉有徑否想見樵叟猶青蓑

馬翰林寒江釣雪圖

元
薩都拉

天寒日暮烏鴉啼江空野闊黃雲低邨南邨北人迹斷
山後山前玉樹迷歌樓酒香金帳暖豈知篷底魚羹飯
一絲天地柳花春萬里煙波蓮葉遠風流不數王子猷
清興不減山陰舟人間富貴草頭露桐江何處覓羊裘
還君此畫三歎息如此江湖歸未得洗魚煮飯捲孤篷

江上雲山好顏色

江天暮雪

明宣宗

大江東去天連水薄暮蕭蕭朔風起須臾吹却凍雲同
六花亂撒滄波裏橋南橋北樹搓牙隔浦紛紛集晚鴉
馬嘶百折蟠雲路犬吠孤邨賣酒家俯仰山川同一色
眼前不辨浪花白茫茫七澤與三湘分明皓彩遙相射
漁翁獨釣寒江濱頃刻瓊瑤飛滿身得魚醉唱湖南曲
欸乃一聲天地春有時倚棹弄長笛洞庭景物清無敵

中流迢遞望君山但見遙空聳銀壁

春江對雪

明楊基

春雲作寒飛鳥絕花雨紛紛暮成雪江山最好雪中看
況是東風二三月披蓑漁立柳邊航戴笠僧歸竹外莊
草暖尚迷雙鷺白樹寒先露一鶯黃我愁春雪看難久
重為江山更回首莫煮清貧學士茶且沽綠色人間酒

長江雪霽圖

明錢宰

昔年壯遊下江漢霽雪千峰排兩岸今年看畫憶舊遊

萬里江山入清玩，岷峨岡脊來蜿蜒。
青城一峰高插天，東馳衡山走千里。
匡廬五老下與石城北固遙相連。
冰壑雪壑互起伏，照見日華破初旭。
神光混茫元氣浮，奮如巨鼇簸坤軸。
爛如秋空雲浩如，滄海濤又如瑤臺銀闕。
天上頭皎皎，白月空秋毫。
回光下照中流水，風吹河漢銀雲起。
中流空闊不勝寒，一洗丹碧秋漫漫。
山川歷歷真偉觀，來往十年遊未半。
不如雲瀛樓上來倚闌，一日看徧江南山。

五言律

野次喜雪

唐明皇

拂曙闔行宮寒臯野望通
繁雲低遠岫飛雪舞長空
賦象恒依物縈迴屢逐風
為知勤恤意先此示年豐

詠雪

唐駱賓王

龍雲玉葉上鶴雪瑞花新
影亂銅烏吹光銷玉馬津
含輝明素篆隱迹表祥輪
幽蘭不可儷徒自繞陽春

詠雪應制

唐上官儀

禁園凝朔氣瑞雪掩晨曦花明棲鳳閣珠散影娥池飄
素迎歌上翻光向舞移幸因千里映還繞萬年枝

從禁苑幸臨渭亭遇雪應制

唐李嶠

同雲接野煙飛雪暗長天拂樹添梅色過樓助粉妍光
含班女扇韻入楚王絃六出迎仙藻千箱答瑞年

雪

李嶠

瑞雪驚千里從風下九霄地疑明月夜山似白雲朝逐
舞花光動臨歌扇影飄大周天闕路今日海神朝

奉和洛陽玩雪應制

唐 沈佺期

周王甲子旦漢后德陽宮灑瑞天庭裏驚春御苑中氛
氲生浩氣颺香舞迴風宸藻光盈尺賡歌樂歲豐

陪幸臨渭亭遇雪應制

唐 李 乂

青陽御紫微白雪下彤闌浹壤流天霈綿區灑帝輝水
如銀度燭雲似玉披衣為得因風起還來就日飛

遊禁苑幸臨渭亭遇雪應制

唐 李 適

長樂喜春歸披香愛雪飛花從銀閣度絮繞玉窗歸寫

曜銜天藻呈祥拂御衣上林紛可望無處不光輝

遊禁苑幸臨渭亭遇雪應制

唐徐彥伯

玉律藏冰候彤階飛雪時日寒消不盡風定舞還遲瓊
樹畱宸矚璇花入睿詞懸知穆天子黃竹漫言詩

奉和聖製野次喜雪應制

唐張說

寒更玉漏催曉色幄前開泱泩雲陰積氤氲風雪迴山
如銀作瓮宮見壁成臺欲驗豐年象飄飄仙藻來

扈從溫泉奉和姚令公喜雪

唐蘇頲

清道豐人望乘時漢主遊恩暉隨霰下慶澤與雲浮泉
煖驚銀磧花寒映玉樓鼎臣今有問河伯且應畱

奉和聖製人日清暉閣宴羣臣遇雪應制

蘇頌

樓觀空煙裏初年瑞雪過苑花齊玉樹池水作銀河七
日祥圖啓千春御賞多輕飛傳綵勝天上奉薰歌

立春日晨起對雪

唐張九齡

忽對林亭雪瑤華處處開今年迎氣始昨夜伴春回玉

潤窗前竹花繁院裏梅東郊齋宿所應見五神來

和姚令公從幸溫湯喜雪

張九齡

萬乘飛黃馬千金狐白裘正逢銀霰積如向玉京遊瑞
色鋪馳道花文拂綵旒還聞吉甫頌不共郢歌儔

和陳校書省中玩雪

唐包融

芸閣朝來雪飄飄正滿空
寒開明月下校理落花中
色向懷鉛白光因翰簡融
能令草玄者迴思入流風

冬晚對雪憶胡居士家

唐王維

寒更傳曉箭青鏡覽衰顏隔牖風驚竹開門雪滿山灑
空深巷靜積素廣庭閒借問袁安舍脩然尚閉關

竹下殘雪

唐丘為

一點消未盡孤明在竹林晴光夜轉瑩寒氣曉仍深還
對讀書牖且闕乘興心已能依此地終不傍瑤琴

和張丞相春朝喜雪

唐孟浩然

迎氣當春至承恩喜雪來潤從河漢下花徧艷陽開不
覩豐年瑞焉知變理才散鹽如可擬願糝和羹梅

和張二自穰縣還途中遇雪

孟浩然

風吹沙梅雪漸作柳園春
宛轉隨香騎輕盈伴玉人
歌疑郢中客態比洛川神
今日南歸楚雙飛似入秦

舟中夜雪有懷盧十四侍御弟

唐杜甫

朔風吹桂水大雪夜紛紛
暗度南樓月寒深北渚雲
燭斜初近見舟重竟無聞
不識山陰道聽雞更憶君

省中對雪寄元判官拾遺昆季

唐 錢起

萬點瑤臺雪飛來錦帳前
瓊枝應比淨鶴髮敢爭先
散影成花月流光透竹煙
今朝謝家興幾處郢歌傳

劉方平西齋對雪

唐 皇甫冉

對酒閒齋晚開軒
臘雪時花飄疑節候色
淨潤簾帷委樹寒枝弱
縈空去雁遲自然堪訪戴
無復四愁詩

和謝舍人雪夜寓直

唐 皇甫曾

禁省夜沈沈春風雪滿林
滄洲歸客夢青瑣近臣心
揮

翰宜鳴玉承恩在賜金建章寒漏起更助掖垣深

旅舍對雪贈考功王員外

唐李端

楊花驚滿路麴市忽狂風驟下搖蘭葉輕飛集竹叢欲
將瓊樹比不共玉人同獨望嶽之棹青山在雪中

峨眉山

唐鄭谷

萬仞白雲端經春雪未殘夏消江峽滿晴照蜀樓寒造
境知僧熟歸林認鶴難會須朝闕去祇有畫圖看

小雪

唐李咸用

散漫陰風裏天涯不可收
壓松猶未得撲石暫能留
閣靜縈吟思途長拂旅愁
崆峒山北面早想玉成丘

玩殘雪寄河南尹劉大夫

唐許渾

艷陽無處避皎潔不成容
素質添瑤水清光散玉峰
眠鷗猶戀草棲鶴未離松
聞在金鑾望羣仙對九重

對雪

許渾

飛舞北風涼玉人歌玉堂
簾帷增曙色珠翠發寒光
柳重絮微濕梅繁香未香
茲晨賀豐歲簫鼓宴梁王

蒙河南劉大夫見示與吏部張公喜雪酬倡輒

敢攀和

許渾

風度龍山暗雲凝象闕陰瑞花瓊樹合仙草玉苗深欲
醉梁王酒先調楚客琴即應攜手去將此助商霖

和梅聖俞雪中同虛白上人見訪

宋林逋

湖上玩佳雪相將惟道林早煙邛意遠春漲岸痕深地
僻過三徑人閒試五禽歸撓有餘興寧復比山陰

西湖舟中值雪

林逋

浩蕩迷空濶，霏霏接水濱。
舟移忽自却，山近未全分。
凍軫閒初泛，溫爐擁薄薰。
悠然詠招隱，何許歎離羣。

十五日雪

宋梅堯臣

新雷奮蛇甲，密雪鬪鷲毛。
正欲裁輕縠，重令著敝袍。
沙泉流復凍，煙萼折還韜。
只待鄰醅熟，微聲聽酒槽。

和欲雪

梅堯臣

雪欲漫天落，雲初著地垂。
臂鷹過野健，走馬上冰遲。
公

子多論酒騷人自詠詩都無少年意只臥竹窗宜

雪後

宋 陳師道

閉閣春雲薄開門夜雪深江梅猶故意湖雁起歸心草
潤畱餘澤窗明度積陰殷勤報春信屋角有來禽

雪

金 周 昂

小雪暮能繁同雲久更昏細燈寒出戶敲樹老當軒竹
葉舊時釀梅花何處邨賦詩空入夜清絕與誰論

雪

金 馮延登

野屋寒無那庭空雪已深山川非舊觀松栢見貞心凍
雀爭餘粒棲鴉點暮林携琴訪谿友清興憶山陰

雪中呈許守

金趙慤

剪水作花開紛紛天上來聲清偏傍竹艷冷欲欺梅積
潤滋年麥餘膏正草萊窮檐休太息幾日是春回

雪

金王仲元

初稀時拂拂稍密自紛紛老樹曉迷月瘦峰寒貼雲色
從空際得聲向靜中聞客枕清無夢哦詩徹夜分

雪谷早行

元虞集

積雪擁柴門行人稍出邨
谿頭或過虎木末不聞猿
接棧迴山閣支橋就樹根
驅車上重坂回首見朝暾

藏雪寮

元張翥

雪山一片雪何日落中華
皎潔無藏處虛空自作花
石厓穿乳竇海岸疊潮沙
底用分荆越諸方總是家

雪

元郭翼

漠漠年華晚霏霏夜色分
江明非借月樹重或兼雲
始

訝花成陣翻愁鶴失羣
梁園詞賦客飄泊獨懷君

春雪

元舒 頓

片片沾芳草紛紛雜落花
籬寒春雀陣檐凍午蜂衙
雲密深藏樹蹊渾不見沙
小窗風力緊呼婢莫烹茶

新雪

明石 珪

雪意已崇朝凌風葉旋飄
著衣初點點入竹故蕭蕭
翠壁誰凝望青帘久費招
期君坐今夕燒燭看瓊瑤

應制題雪景

明于慎行

輕綃寒色動不是月華開鳥道千巖迥江光一徑迴虛
無分玉樹彷彿想瑤臺未擬歌黃竹陽春徧九垓

五言排律

喜雪

唐明皇

日觀卜先征時巡順物情風行未備禮雲密遽飄靈委
樹寒花發縈空落絮輕朝如玉已會庭似月猶明既覩
膚先合還欣尺有盈登封何以報因此謝功成

奉和聖製喜雪應制

唐張說

聖德與天同封巒欲報功詔書期日下靈感應時通觸
石雲呈瑞含花雪告豐積如沙照月散似絮從風舞集
仙臺上歌流帝樂中遙知百神喜灑路待行宮

禁闌翫雪寄薛左丞

唐錢起

元雲低禁苑飛雪滿神洲虛白生臺榭寒光入冕旒粉
凝宮壁淨乳結洞門幽細繞迴風轉輕隨落羽浮怒濤
堆砌石新月孕簾鉤為報詩人道曲豈年誦聖猷

禮部試早春殘雪

唐姚康

微暖春潛至，輕明雪尚殘。
銀鋪光漸濕，珪破色仍寒。
無柳花常在，非秋露正漙。
素光浮轉薄，皓質駐應難。
幸得依陰處，偏宜帶月看。
玉塵消欲盡，窮巷起袁安。

望禁門松雪

唐王涯

宿雲開霽景，佳氣此時濃。
瑞雪凝清禁，祥煙幕小松。
依稀稀鴛瓦，出隱映鳳樓。
重金闕清光照，瓊枝瑞色封。
葉鋪全類玉，柯偃乍疑龍。
詎比寒山上，風霜老昔容。

殘雪

唐李商隱

旭日開晴色寒空失素塵繞牆全剝粉傍井漸消銀刻
獸摧鹽虎為山倒玉人珠還猶照魏壁碎尚畱秦落景
驚侵晝餘光誤惜春檐冰滴鴛管屋瓦鏤魚鱗嶺霽嵐
光折松暄翠粒新擁林愁拂盡著砌恐行頻焦寢欣無
患梁園去有因莫能知帝力空此荷平均

喜雪

李商隱

朔雪自龍沙呈祥勢可嘉有田皆種玉無樹不開花班扇
慵裁素曹衣詎比麻鴛歸逸少宅鶴滿令威家寂寞

門扉掩依稀履迹斜人疑遊麪市馬似困鹽車洛水妃
虛妬姑山客漫誇聯辭雖許謝和曲本慙巴粉署闌全
隔霜臺路漸賒此時傾賀酒相望在京華

望終南春雪

唐李子卿

山勢抱西秦初年瑞雪頻色搖鶉野霽影落鳳城春輝
晶瓊峰逼晶明玉樹親尚寒由氣勁不夜為光新荆岫
全疑近崑丘宛合鄰餘輝儻可借迴照讀書人

和吳學士對春雪獻韋令公次韻

唐黃滔

春雪下盈空翻疑臘未窮連天寧認月墮地屢兼風忽
誤邊沙上應平火嶺中林間妨走獸雲際落飛鴻梁苑
還吟客齊都省創宮掩扉皆瑾北移律愧居東書幌飄
全濕茶鐺入旋融奔川半畱滯疊樹互玲瓏出戶行瑤
砌開園見粉叢高才興詠處真宰答殊功

都堂試貢士日慶春雪

唐李損之

春雪晝悠颺飄飛試士場綴毫疑起草沾字共成章匝

地如鋪練凝階似截肪
鷺毛縈樹合柳絮帶風狂
投息方殊慶豐年已報祥
應知郢上曲高唱出東堂

小雪

唐僧無可

片片互玲瓏飛揚玉漏終
乍微全滿地漸密更無風
集物圓方別連雲遠近同
作膏凝瘠土呈瑞下深宮
氣射重衣透花窺小隙通
飄秦增舊嶺發漢攪長空
迥冒巢松鶴孤鳴穴鳥虫
過三知臘盡盈尺賀年豐
委積休聞竹稀疏漸見鴻
蓋沙資澶漫灑海助冲融
草木潛加潤

山河更益雄因知天地力覆育有全功

禁中雪

明高啓

君王原尚儉臺殿忽瓊瑤環素凝宮沼飛花綴苑條坊
雞鷺曙早仗馬喜寒驕金扇開時看丹墀掃後朝台司
呈賀表樂部奉仙謠須信陽光近都先別處消

七言律

奉和喜雪應制

唐徐安貞

兩宮齋際近登臨雨雪紛紛天晝陰祗為輕寒遲瑞色

頓教正月滿春林蓬萊北上旌門暗花萼南歸馬跡深
自有三農歌帝力還將萬庾答堯心

長安喜雪

唐朱灣

千門萬戶雪花浮點點無聲落瓦溝全似玉塵消更積
半成冰片結還流光含曉色清天闕輕逐微風遶御樓
平地已霑盈尺潤年豐須荷富民侯

和王員外雪晴早朝

唐錢起

紫微晴雪帶恩光繞仗偏隨鵷鷺行長信月留寧避曉

宜春花滿不飛香
獨看積素凝清禁
已覺輕寒讓太陽
題柱盛名兼絕唱
風流誰繼漢田郎

奉訓辛大夫喜湖南臘月連日降雪見示之作

唐
劉長卿

長沙耆舊拜旌麾
喜見江潭積雪時
柳絮三冬先北地
梅花一夜徧南枝
初開窗閣寒光滿
欲掩軍城暮色遲
閭里何人不相慶
萬家同唱郢中詞

春雪

唐
李建勳

南國春寒朔氣回
霏霏還阻百花開
全移暖律何方去
似誤新鶯昨日來
平野旋消難蔽草
遠林高綴却遮梅
不知金勒誰家子
只待晴明賞帝臺

對雪

唐李商隱

寒氣先侵玉女扉
清光旋透省郎闈
梅花大庾嶺頭發
柳絮章臺街裏飛
欲舞定隨曹植馬
有情應濕謝莊衣
龍山萬里無多遠
留待行人二月歸

奉和僕射相公春澤稍愆聖君軫慮嘉雪忽降

品彙昭蘇即事書成四韻

唐杜牧

飄來雞樹鳳池邊，漸壓瓊枝凍碧漣。
銀闕雙高銀漢裏，玉山橫列玉墀前。
昭陽殿下風迴急，承露盤中月彩圓。
上相抽毫歌帝德，一篇風雅美豐年。

敘雪寄喻鳧

唐方干

密片無聲急復遲，紛紛猶勝落花時。
逡巡不覺藏沙渚，宛轉偏宜傍柳絲。
透室虛明非月照，滿空回散是風吹。
高人坐臥才方逸，援筆應成六出詞。

霽後望山中春雪

宋 王禹偁

誰種離離碎玉苗
曉樓吟望興偏饒
白雲作伴宜長在
紅日無情已半消
聚映早霞明野寺
散隨春水過谿橋
世間安得王摩詰
醉展霜縑把筆描

和殷舍人蕭員外春雪

宋 徐鉉

萬里春陰乍履端
廣庭風起玉塵乾
梅花嶺上連天白
蕙草堦前特地寒
晴去便為經歲別
興來何惜徹宵看
此時鵲侶皆閒暇
贈答詩成禁漏殘

壬子十一月二十九日時雪方洽

宋
韓琦

近臘猶慳六出繁忽驚盈尺及民寬萬方蒙澤人人賀
通夕無風陣陣乾危石蓋深鹽虎陷老枝擎重玉龍寒
欲知靈鷲銀為界試陟高樓一望看

雪

宋
林逋

瓦溝如粉疊樓腰高會誰能解酒貂清夾曉林初落索
冷和春雨轉飄蕭堪憐雀避來閒地最愛僧衝過短橋

獨有閉關清隱者一軒孤况寄顏瓢

讀眉山集次韻雪詩

宋 王安石

若木昏昏末有鴉凍雷深閉阿香車
搏雲忽散篴為屑剪水如分綴作花
擁帚尚憐南北巷持杯能喜兩三家
戲揆弄掬輸兒女羔袖龍鍾手獨叉

雪後書北臺壁

宋 蘇軾

黃昏猶作雨纖纖夜靜無風勢轉嚴
但覺衾裯如潑水不知庭院已堆鹽
五更曉色來書幌半夜寒聲落畫檐

試掃北臺看馬耳未隨埋沒有雙尖

其二

城頭初日始翻鴉陌上晴泥已沒車凍合玉樓寒起粟
光搖銀海眩生花遺蝗入地應千尺宿麥連雲有幾家
老病自嗟詩力退空吟冰柱憶劉義

雪夜獨宿柏仙菴

蘇軾

晚雨纖纖變玉霙小菴高臥有餘清夢驚忽有穿窗片
夜靜惟聞瀉竹聲稍壓冬溫聊得健未濡秋旱若為耕

天公用意真難會又作春風爛熳晴

次秀野詠雪韻

宋朱子

一夜同雲匝四山曉來千里共漫漫不應琪樹猶含凍
翻笑楊花許耐寒乘興正須披鶴氅淪甘差喜破龍團
無端酒思催吟筆却恐長鯨吸海乾

十二月十日

宋方岳

酒醒開門雪滿山徑穿疎竹上危闌谿山與我俱成畫
草樹惟梅大耐寒留伴夜深銀鑿落莫緣春近玉闌珊

老枝擎重供詩嚼一洗相如渴腑肝

立春前一日雪

方岳

歷眼看看臘浹旬山河大地一時新不成過臘都無雪
只隔明朝便是春夜半有誰過剡曲年豐何處不堯民
草亭祇在梅花外知與人間隔幾塵

雪晴呈玉堂諸公

金蔡松年

雪晴松頂玉爛斑曉眼清於化鶴山欲立凍雲搜傑句
却思仙客退清班攢瑜帳底沈香火蒼苔花中碧霧鬟

喚取廣寒脩月手月波千丈捲春還

雪

金 党懷英

寶花天雨曉紛紛佛界莊嚴盡白銀待臘風雲初接勢
犯寒糟麴若為神園中芳草誰能賦江上梅花獨自春
半臂騎驢得佳句橋邊誰喚灞陵人

應制雪詩

金 楊雲翼

陰雲破臘不曾晴瑞雪隨風落五更積玉未平鵲鵲瓦
飛花先滿鳳凰城潤深南畝千疇綠塵壓邊沙萬里清

最好壽杯浮喜色明年洗眼看昇平

雪中同周臣內翰賦

金王仲元

天上琪花散不收溫溫叶氣浹皇州橫谿月淡梅宜臘
平野風閒麥有秋清興雅高東武會孤吟誰似灞陵遊
西山玉立三千丈好句都輸趙倚樓

春雪

金元德明

幾日韶華雪更侵龍公試手本無心寒留整整斜斜態
暖入融融洩洩陰著柳直疑香絮重擁階何似落花深

前頭桃李應無恙，賸破相如賣賦金。

大雪出三橋寓樓

元方回

凍雀愁鶯噤不譁，漫天浩瀚逐風斜。
映樓橫過三千丈，接屋平鋪十萬家。
靜夜有窗皆貯月，寒空無樹不開花。
詩成欲撚冰鬚斷，聊舉深杯答歲華。

春雪

元牟巖

一冬只辦作嚴寒，剪水飛花事竟難。
閉戶不知春意動，撲窗忽覺雨聲乾。
頗聞萬畝正雲集，何處一蓑如畫看。

但喜畦蘇得蘇醒從今小摘有餘懽

湖樓玩雪

元白珽

上湖十里捲簾中幻出瑤華第一宮
山勢蹴天銀作浪柳行橫地玉為虹
漁蓑鶴氅同為我爵古羊羔不負公
明日鳳城朝退早一鞭曾約試吟驄

僊華巖雪

元柳貫

氷柱浮空曉色蒙海波搖動玉玲瓏
九清內景游氛外五岳真形太素中
微月升壇初映鶴長雲連野不驚鴻

仙姬宴坐瑤池上
催捧蟠桃獻木公

和余太守對雪見懷

元 傅若金

江雪寒連驛樹遙
鶴裘清坐聽蕭蕭
中天月避光芒出
南國雲含瘴癘消
因憶石田春種玉
乍疑銀漢夕通橋
使君辛苦迎驄馬
也念幽居客闕寥

雪中早朝

元 張翥

北風吹雪浩漫漫
曉出津橋立馬看
春入上林花樹早
水連平地海波乾
金城萬雉微茫濕
月闕雙龍顛
肩寒

今日天顏知有喜
紫宸朝下散千官

壬申元日大雪二日立春晴景豁然春宴有作

張翥

白雪青天映日紅
樓臺高下玉山中
盤蔬曉送冰絲脆
釵杏春生蠟蒂融
北斗龍杓迴後夜
東皇鑾輅駕靈風
何如得接雲霄上
一看煙花繞禁宮

廣微天師祈雪有應詩以美之

元貢師泰

九枝燈照碧壇空
龍虎旗高滿殿風
綠簡夜深朝玉陛
素幢春淺拂珠宮
一天凍色星河合
萬里冰華陸海同
明日內家應錫宴
綵符爭取綴釵蟲

雪夜直宿玉堂

元黃清老

琪樹花生禁漏遲
金莖月色近書闥
白雲入水春無迹
銀漢橫空夜有輝
竹靜似聞蒼玉佩
松寒欲傍綠荷衣
乾坤清氣蓬萊表
獨對天風拂素微

雪中

明高啓

舟絕寒江凍不潮
縈沙拂柳影脩脩
纔從漁浦磯邊積
旋向樵邨竹外飄
撲馬憶從年少樂
點袍曾逐侍臣朝
如今獨坐吟詩句
茅屋茶煙冷未消

西山霽雪

明金幼孜

海上雲收旭景新
連峰積雪淨如銀
晴光迥入千門曉
淑氣先回上谷春
瑤樹生輝寒已散
瓊林銷凍暖偏勻
玉堂相對題詩好
移席鉤簾把酒頻

和曾學士元日遇雪

明錢幹

急雪飛花滿御隄朝元紫禁待班齊飄來玉佩行偏重
舞落金鋪望欲迷鐘動城鴉翻白羽仗回路馬盡霜蹄
高歌郢曲知難和未數陽春舊日題

雪塵

明瞿佑

朔風刮地捲寒埃非霰非霜旋作堆密灑漁蓑粘玉屑
亂隨馬足散銀杯曉粧都棄香奩粉夜坐頻挑鐵筋灰
世上熱官那識此東華爭踏軟紅回

和西野學士己亥元日雪

明羅肅

長樂鐘殘五漏微
蓬萊天近六花飛
光含銀燭調元氣
色湛瓊筵促曙輝
已放素華凝禁苑
還飄落絮點朝衣
玉堂學士文章伯
獻歲詞高和者稀

雪後早朝

明

李東陽

六日長安雪滿城
五更鐘鼓一時晴
水精宮冷雲猶凍
鵷鵲樓高月正明
朝馬不嘶金勒靜
院燈無影玉堂清
祇應天上寒如許
怪底人間夢不成

祈雪齋居

明

吳維嶽

太乙壇開薦禮勤省垣梧竹絕塵氛靈光正想通三極
清漏微聞下五雲窗散爐熏看月淡簾垂竹影坐星分
無才未就豐年頌祇有齋心奉聖君

雪和蘇長公原韻

明 朱之蕃

漣漣飛霰競穠纖酒力難禁氣轉嚴望入龍沙光奪月
嚙來瀚海味非鹽疑施白氍鋪原野喜露黃綿射屋檐
遙憶江南春信早草痕融凍出新尖

其二

珠林數點露栖鴉
竚待纖阿御玉車
遲客谿頭迴釣艇
探春驢背見梅花
翱翔白鳳雲中闕
縹緲瑤臺海上家
大地河山成坦蕩
漫勞臨路泣三叉

玉皇閣對雪懷黃丈淳父

明

王穉登

雪後登樓興未賒
仙人香案挂寒霞
帝京初曉渾如玉
宮樹先春已著花
人意喜時消作水
馬蹄行處踏為沙
黃公壚畔新醅綠
遊子如何不憶家

五言絕句

春雪

唐東方虬

春雪滿空來觸處似花開不知園裏樹若箇是真梅

終南望積雪

唐祖詠

終南陰嶺秀積雪浮雲端林表明霽色城中增暮寒

春雪

唐劉方平

飛雪帶春風徘徊正繞空君看似花處偏在洛陽東

逢雪宿芙蓉山主人

唐劉長卿

日暮蒼山遠天寒白屋貧柴門聞犬吠風雪夜歸人

雪行寄褒子

唐 韋應物

浙瀝覆寒騎飄飄暗川容行子郡城曉披雲看杉松

詠春雪

韋應物

徘徊輕雪意似惜艷陽時不悟風花冷翻令梅柳遲

春雪

唐 劉禹錫

三月雪連夜未應傷物華口緣春欲盡留著伴梨花

江雪

唐 柳宗元

千山鳥飛絕萬徑人蹤滅孤舟蓑笠翁獨釣寒江雪

夜雪

唐白居易

已訝衾枕冷復見窗戶明夜深知雪重時聞折竹聲

宮中樂

唐令狐楚

雪霽長楊苑冰開太液池宮中行樂日天下盛明時

雪

唐陸暢

怪得北風急前庭如月輝天人寧許巧剪水作花飛

宋復古晴川晚雪

宋文同

霽雪變雲林寒光混煙水遙山定何處渺漭纔可指

雪窗

宋 葛長庚

素壁青燈暗紅爐夜火深雪花窗外白一片歲寒心

人日出游湖上

宋 楊萬里

城中雪一尺山中雪一丈地上都已消却在松梢上

雪花

金 虞仲文

瓊英與玉蕊片片落前池問著花來處東君也不知

殘雪

明 楊基

庭雪半消殘猶存舊臘寒春風如有意留待隔年看

白雪曲

明 何景明

梅花開雪中相看鬪奇絕
常教雪似花莫遣花如雪

子夜歌

明 胡汝嘉

月照庭上雪燦若玉玲瓏
風吹雪如絮飛入錦屏中

人日對雪

明 柳應芳

人日逢晴勝不晴
雪亦嘉當由催剪綵碎却幾梅花

七言絕句

遊苑遇雪應制

唐 李嶠

散漫祥雲逐聖迴飄飄瑞雪繞天來不能落後爭飛絮
故欲迎前綻早梅

苑中遇雪應制

唐 宋之問

紫禁仙輿詔旦來青旗遙望春臺不知庭霰今朝落
疑是林花昨夜開

奉和春日玩雪應制

宋之問

北闕彤雲掩曙霞東風吹雪舞山家瓊章定少千人和
銀樹長芳六出花

人日玩雪應制

唐 劉憲

勝日登臨雲葉起芳風搖蕩雪花飛
呈暉幸得承金鏡
颺彩還將奉玉衣

苑中遇雪應制

唐 李乂

龍驂曉入望春宮
正逢春雪舞東風
花光併灑天文上
寒氣行消御酒中

苑中遇雪應制

唐 徐彥伯

千鐘聖酒御筵披
六出祥英亂繞枝
即此神仙對瓊圃

何煩轍迹到瑤池

苑中人日遇雪應制

唐
趙彥昭

始見青雲干律呂
俄逢瑞雪應陽春
今日回看上林苑
梅花柳絮一時新

雪夜下朝呈省中一絕

唐
韋應物

南望青山滿禁闈
曉陪鵷鷺正差池
共愛朝來何處雪
蓬萊宮裏拂松枝

休暇日訪王侍御不遇

韋應物

九日驅馳一日閒尋君不遇又空還怪來詩思清人骨
門對寒流雪滿山

春雪

唐韓愈

新年都未有芳華二月初驚見草芽白雪却嫌春色晚
故穿庭樹作飛花

酬王二十舍人雪中見寄

韓愈

三日柴門擁不開堦平庭滿白皚皚今朝踏作瓊瑤迹
為有詩從鳳沼來

早發廬江途中遇雪寄李侍御

唐
朱慶餘

蘆葦聲多雁滿陂
濕雲連野見山稀
遙知將吏相逢處
半是春城賀雪歸

西歸

唐
元稹

寒花帶雪滿山腰
著柳冰珠曳碧條
天色漸明回一望
玉塵隨馬渡藍橋

新雪

唐
白居易

不思朱雀街東鼓不憶青龍寺後鐘
惟憶夜深新雪後
新昌臺上七株松

宮詞

唐王涯

五更初起覺風寒
香炷燒來夜已殘
欲捲珠簾驚雪滿
自將紅燭上樓看

霽雪

唐戎昱

風捲寒雲暮雪晴
江煙洗盡柳條輕
檐前數片無人掃
又得書窗一夜明

早春雪中

戎昱

陰雲萬里晝漫漫，愁坐關心事幾般。
為報春風休下雪，柳條初放不禁寒。

和李十二舍人直日放朝對雪

唐姚合

今朝街鼓何人聽，朝客關門對雪眠。
豈比直廬丹禁裏，九重天近色彌鮮。

淮南李相公席上賦春雪

唐章孝標

六出花飛處處飄黏窗著砌上寒條朱門到曉難盈尺
盡是三軍喜氣消

夢令狐學士

唐李商隱

山驛荒涼白竹扉殘燈向曉夢清輝
右銀臺路雪三尺鳳詔裁成當直歸

寄鄰莊道侶

唐韓偓

聞說經旬不啓關藥窗誰伴醉開顏
夜來雪壓邨前竹賸見谿南幾尺山

雪中偶題

唐鄭谷

亂飄僧舍茶煙濕密灑歌樓酒力微
江上晚來堪畫處漁人披得一簑歸

蔚州宴上遇新雪

唐雍陶

葫蘆河畔逢秋雪疑是風飄白鶴毛
坐客停杯看未足將軍已濕褐花袍

對雪憶往歲錢塘西湖訪林逋

宋梅堯臣

昔乘野艇向湖上拍岸去尋高士初折竹壓籬曾礙過
却穿松下到茅廬

和張屯田雪中朝拜天慶觀 宋文同

藪藪遙空墮碎瓊一街寒色曉風清題輿想入簫臺下
似駕飈輪向玉京

其二

寶幢珠節共玲瓏九虎巖闕有路通遙望玉宸端象簡
宛然身在廣寒宮

春近

宋 黃庭堅

亭臺經雨壓塵沙
春近登臨意氣加
更喜輕寒勒成雪
未春先放一城花

雪意

宋 朱子

向晚浮雲四面平
北風號怒達天明
寒窗一夜清無睡
擬聽杉篁葉上聲

殘雪未消次擇之韻

朱子

脚底悲風舞凍鴉
此行真是躡蒼霞
仰頭若木敷瓊蕊

不是人間玉樹花

雪中

宋
葛長庚

曉來紅日尚羞明
四外彤雲欲放晴
一夜九天開玉闕
六花萬里散瓊英

雪後晚晴四山皆青
惟東山全白
賦最愛東山

晴後雪絕句

宋
楊萬里

只知逐勝忽忘寒
小立春風夕照間
最愛東山晴後雪
軟紅光裏湧銀山

郡圃殘雪

楊萬里

南風融雪北風凝
晚日城頭已可登
莫道雪融便無迹
雪融成水水成冰

雪

金高士談

簌簌天花落未休
寒梅疎竹共風流
江山一色三千里
酒力消時正倚樓

雪

金呂中孚

隨風拂拂玉花飄
入夜寒窗更寂寥
爐火已殘燈未燼

一簾疎竹白蕭蕭

雪行

金元德明

五更驢背滿靴霜殘雪離離草樹荒身在景中無句寫
却教人比孟襄陽

清明大雪三日

元方回

半月雕梁燕子歸怯寒著盡舊綿衣何人醉眼西湖路
錯認楊花作雪飛

題江干初雪圖

元戴表元

斷樹寒雲古岸隈
漁翁初撥小船開
看渠風雪忙如許
還有魚兒上釣來

題江臯雪霽卷

元蒲道源

山川玉潔映朝暉
人世鴻濛果是非
只許詩家占清景
漁蓑偷載一船歸

雪後偶成

元虞集

曉來殘雪在陂陀
遠似羊羣或似鷺
憶踏春泥看柳色
駝裘貂帽渡冰河

次韻雪

元楊載

研光帽子舞山花吹落曾城萬仞斜
安得飈輪為我駕
一時飛到列仙家

竹枝詞

元王士熙

山前馬陣爛如雲
九夏如秋不是春
昨夜元冥剪飛雪
雲州山裏盡堆銀

雪霽晚歸偶成

元納延

公子腰刀下直歸
紅門晚出馬如飛
東家積雪無人掃

却恨春泥濺錦衣

十一月十二日崇文閣下私試二十三日日出和

張仲舉

元 吳師道

官燭風簾徹夜明
屋高人醉易寒生
不知卧聽蕭蕭雪
何似山窗灑竹聲

灤都寓興

元 馬臻

昨夜分明夢到家庭前
開偏石榴花龍門不放東風過
五月平灤雪滿沙

冬景

明
宣宗

池頭六出花飛徧池水無波凍欲平一望玻璃三百頃
好山西北玉為屏

送雪

明
朱有燉

天山一色凍雲垂
畫樓臺綴玉時
準備煖金香盒子
明朝送雪與相知

長安春雪曲

明
王穉登

春風吹雪下桑乾
添得城中一夜寒
鵲樓高消不盡

長安街上馬頭看

雜言

王穉登

凍雲寒樹曉模糊
水上樓臺似畫圖
紅袖誰家乘小艇
卷簾看雪過鴛湖

飲秋澗隱居夜歸值雪有作

明

陳鶴

獨行長路儼如僧
水滴檐牙半是冰
歸到空園人已靜
雪花穿戶打殘燈

雪中訪嘉則於寶奎寺之樓店


明
徐渭

山徑尋君重復重
小樓百尺臥元龍
安窗偏向梅花角
去映江天雪數峰

送僧過洞庭

明
僧大香

江雲空寂塞鴻哀
竹笠繩鞋歸去來
七十二峰深雪裏
炊煙何處辨樓臺



御定佩文齋詠物詩選卷十四

欽定四庫全書

集部

御定佩文齋詠物詩選卷十五至十九

詳校官侍郎_臣李封

主事銜_臣徐以坤覆勘

總校官檢討_臣何思鈞

校對官中書_臣高 中

謄錄監生_臣蔡炎林

欽定四庫全書

御定佩文齋詠物詩選卷十五

冰類

五言古

詠冰應教

梁
沈君攸

日華照水彩灼爍自相明
陰潭欲半解陽岸已全輕
未釋苔文隱將銷草氣生
稍得觀魚上非獨見狐驚
儻逢魏后術當驗可為城

七言古

明冰篇

唐富嘉謨

北陸蒼茫河海凝南山闌干晝夜冰素彩峨峨明月升
深山窮谷不自見安知採斲備嘉薦陰房涸沍掩寒扇
陽春二月朝始暎春光澹沲度千門明冰時出御至尊
彤庭赫赫九儀備腰玉煌煌千官事明冰畢賦周在位
憶昨沙漠寒風漲崑崙長河水始壯汗漫峻嶒積亭障
噍噍鳴雁江上來禁苑池中冰復開搖青涵綠映樓臺

豳歌七月王風始鑿冰藏用昭物軌四時不忒千萬祀

陳翊郎中北亭送侯釗侍御賦得帶水流歌

唐
盧綸

谿中鳥鳴春景旦一派寒冰忽開散壁方鏡圓流不斷
白雲鱗鱗滿河漢疊處淺旋處深撇捩寒魚上復沈羣
我爲鼓舞揚清音主人有客簪白筆玉壺貯此光如一持
此贈君君飲之聖君識君冰玉姿

五言排律

玉壺冰

唐 王季友

玉壺知素結止冰復中澄
堅白能虛受清寒得自凝
分形同曉鏡照物掩宵燈
壁映圓光入人驚爽氣陵
金罍何足貴瑤席幾回升
正值求珪瓚提携共飲冰

薦冰

唐 闕名

西陸宜先啓春寒寢廟清
歷官分氣候天子薦精誠
已辨瑤池色如和玉佩鳴
禮餘神轉肅曙後月殘明
雅合霜容潔非同雪體輕
空憐一掬水珍重此時情

薦冰

唐
盧鈞

薦冰朝日後闢廟曉光清不改晶瑩質能彰雨露情且
無霜共潔豈與水均明在捧搖寒色當呈表素誠凝姿
陳俎豆浮彩映窗楹皎皎盤盂側稜稜嚴氣生

薦冰

唐
范傳質

乘春方啓閉羞獻有常程潔朗寒光徹輝華素彩明色
凝霜雪淨影照冕旒清肅肅將崇禮兢兢示捧盈方圓
陳玉座大小表精誠朝覲當西陸桃弧每共行

七言律

和人與人分惠賜冰

唐 楊巨源

天水藏來玉墮空，先頒密署幾人同。
映盤皎潔非關露，當扇清涼不在風。
瑩質方從綸閣內，凝輝更向畫堂中。
麗詞珍貺難雙有，迢遞金輿殿角東。

冰花

明 朱之蕃

璇空風急暮雲平，幻出飛花下玉京。
頃刻粧成欺楮葉，郊原踏遍勝瓊英。
光搖書幌人忘寐，香藉庭梅夜轉清。

吟就不妨消渴甚天應付與點茶鐺

七言絕句

豪家夏冰詠

唐
雍裕之

金錯銀盤貯賜冰清光如聳玉山稜
無論塵客閒停扇
直到消時不見蠅

御定佩文齋詠物詩選卷十五

欽定四庫全書

御定佩文齋詠物詩選卷十六

虹霓類

五言古

詠虹

唐
董思恭

春暮萍生早
日落雨飛餘
橫彩分長漢
倒色媚清渠
梁前朝影出
橋上晚光舒
願逐旌旗轉
飄飄侍直廬

五言律

詠虹

唐蘇味道

紆餘帶星渚窈窕架天潯空因壯士見還共美人沉遠
勢含良玉神光藻瑞金獨留長劍影寧負昔時心

賦得浦外虹

唐陳潤

日影化為虹彎彎出浦東一條微雨後五色片雲中輪
勢隨天轉橋形跨海通還將飲水處持送使車雄

五言排律

賦得虹藏不見

唐徐敞

迎冬小雪至應節晚虹藏玉氣徒成象星精不散光美人初比色飛鳥罷呈祥石澗收晴影天津失彩梁霏霏空暮雨杳杳映殘陽舒卷隨時令因知聖歷長

七言絕句

仙人詞

唐陳陶

小隱山人十洲客莓苔為衣雙耳白青編遺我忽隱身暮雨虹霓一千尺

初秋暮雨

宋楊萬里

禾穗輕黃雨淺青
邨春已報隔林聲
忽驚暮色翻成曉
仰見雙虹雨外明

暮景

元黃庚

浮雲開合晚風輕
白鳥飛邊落照明
一曲彩虹橫界斷
南山雷雨北山晴

驟雨

元張弘範

風擁黃雲龍駕海
雷驅紫電雨翻盆
長虹千尺忽截斷
一片煙波起市門

奉同王浚川海上雜歌

明薛蕙

石門雙闕入蓬瀛
日日惟看雲霧生
白蜃吹霓晴後見
翠蚪銜月夜中行

御定佩文齋詠物詩選卷十六